

Di „Alt Fasnet“ und „Turnschuah-Hexa“



Frihar hond sich dia Kind scho vor da Fasnat troffa –
und send mit dam Roland sinni Lärvli uff dr Schtross rum gloffa.

Mit altam Häs hätt mr sich verkleidat – und war im a andara niamols neidig.

Vor vill Johr hätt as Kutta und Dominos gea, fast i jedam Haus hätt mr' dett so a Häs gsea.

Mr hätt i da Heiser und Wirtschafta uff gsait und gsunga, dia Fasnet war immer guat glunga.

Aber es greschte am Fasnetsmetig war fr is Kind,
weil do - da Rosawirt a rautig Wurscht aus sim Kessel bringt.

Jetzt **wahlad** Kind und grauße Buaba uff am Sofa rum, ihna isch as langweilig no dond si a da Fasnet
no dumm.

Si juckad im Haus anstatt si gond naus.

Dond a mol read hexa und a Larva na, Suscht gend ar as Häs bei mir aa.

Friar sind dia Hexa mit da Larva uff am Gsiet ganga, heit hätt mr' d Larva am **Buckel** hanga.

Dia meishta hond it mol a Larva oder Bessa dabei, desch isch ihna grad einerlei.

Weil d`Frisur kinnt jo verutscha,
no miast mr sich wieder neu rausputza.

A Hex isch ersch komplett,
wenn si`d Larva uff am Gsiet hätt.

Telefoniera mit am Handy moss a Hex wohl it, neamad doch liaber euran Bessa mit.

Und wa hau i it no gsea -
a da Fiass hond si jetzt no **Turnschuah** danna, des moss mr doch glei verbanna.

Welladinga kinnt sich mit jedem Narradorf messa,
drum ihr Narra und Hexa dond eurini Larva und Schdrauschuah it vergessa.

Aber jungi Maschkara hond an Neustart kett, des wird jedes Johr besser, do mach i jedi Wett.

Dia Maschkara hond gschellat a da Tir und jeder hätt off dau, glaubats mir.

Hausnisitzer, Langweiler, Schlofer und Spaßbremse - kinn ar mr au it leida,
des wem ar a da Fasnet doch vermeida.

Drum rischtat euch fr näscht Johr, ihr liaba Leit, staubat as alt Häs ab und neamat euch dia Zeit.

**Jetzt wära mr froh i dera schwera Zeit,
wenn as näscht Johr wieder a reati Fasnet geit.**

Narri Narro der Maschker und die kleine Hexe